

雍孝聞蜀士之秀也元符末有聲太學學者推重之崇寧初省試奏名第一前此屢上封事剴切九重回已默識其名至是殿策中力詆二蔡及時政未便者徽宗大怒減死竄海外宣和末上思其忠親批云雍孝聞昨上書致罹刑辟忠誠可嘉特開落過犯授修武郎閣門宣贊舍人命頒而孝聞死矣於是錄其一子純爲右選紹興初從張魏公入蜀魏公令屬趙喆軍中喆誅死純坐編管旣死魏公憐之後致其子安行一官紹興間以告訐流嶺外不知所終

張咸漢州人應制舉初出蜀過夔州郡將知名士也一見遇之甚厚因問曰四科優劣之差見於何書無以對守曰載孟子註中因檢示之且曰不可不牢攬之也張道中漫思索著論成篇至都閣試之日以此爲首題張更不注思而就主文范淳夫也覽之大喜遂置第一張卽魏公乃翁也唐咸通十一年南詔入寇成都西川之民爭走入城所占地不過一席許雨則戴蓋以自庇又乏水